

La diplomazia svizra da 1967 a 1969

■ (gsc) «**Mo in problem chaschuna qua mintgant remartgas brutas e criticas en connex cun nossas relaziuns uschiglio uschè prosperaivlas cun ils Stadis unids:** l'activitad da las bancas svizras sut l'ensaina da noss secret bancar (...). Cun l'ir dal temp pudess lezza dumonda vegnir in problem politic serius areguard quellas relaziuns.» Quai scriveva 1967, pia avant 45 onns, in profet fitg bain infurmà: Il Bernais Felix Schnyder (1910–1992), ambassadur a Washington da 1966 a 1975, en in rapport al Departament politic (oz DFAE) ch'ins po leger sco «doc. 58» (dodis.ch/33138) en il tom 24 dals «Documents diplomatics svizzers» (DDS). Lez tom vegn preschentà glindesdi, ils 27 d'avust a las 17.00 a Berna, tar l'Archiv federal, Archivstr. 24, damanaivel da la punt da Montbijou, dals istorichers Hans Ulrich Jost, parsura da la Cumissiun DDS, e Sacha Zala, directur dals DDS*.

Visitass, migraziuns, fugitivs

Tgi che legia u consultescha la nova publicaziun s'entaupa adina puspè cun temas ch'ans preoccupan anc adina. I na sa tracta betg mo d'evasiun fiscala e secret bancar, mabain er, per exempel, da las instituziuns europeicas (doc. 165, dodis.ch/33034), la xenofobia (doc. 120, dodis.ch/32837) e la scolaziun d'uffants immigrads (doc. 166, dodis.ch/32356). Gist dals onns

1967–1969 ha noss minister da l'exteriur Willy Spühler (1902–1990) fatg otg viadis a l'ester, in schizunt en l'Africa da l'ost (doc. 161, dodis.ch/33643): Kenia, Ruanda, Tansania ed Uganda. Cuss. fed. Hans Schaffner (1908–2004), schef dal Departament federal da l'economia publica, è viaggià en Argentina (doc. 160, dodis.ch/33267) sco er en Giapun ed en la colonia britannica da Hong Kong, oz part da China (doc. 25, dodis.ch/32485). 1967 è Rudolf Gnägi (1917–1985) i en l'Uniun sovietica sco emprim cusseglier federal (doc. 44, dodis.ch/32783). Dus eveniments han commovì la Svizra. 1968 han las armadas dal Patg da Varsovia supprimì la «primavaira da Prag», la quala era dal rest er ina «primavaira da Bratislava»; la Svizra ha lura beneventà blers fugitivs slovac e tschecs (doc. 108, dodis.ch/33048). 1969 a Kloten han quatter terrorists sajettà sin in Boeing da la cumpagnia israeliana El-Al; sin quai ha in funcziunari da segirtad israelian mazzà in dals agressurs, in burgais da Jordania (doc. 130, dodis.ch/33710). Il tom 25 dals «Documents diplomatics svizzers» merita pia l'attenziun da tgi che s'interessa da nossa istorgia en la segunda mesadad dal tschientaner passà, en connex cun ils problems internaziunals d'oz.

***Preannunzia giavischada enfin als 23 d'avust:
Telefon 031 325 12 36, posta electronica
dds@dodis.ch.**